

ოთხი ბურთი “ფახთაქორის” კარში

თბილისი. “ლოკომოტივის” სტადიონი. 12 სექტემბერი.

“დინამო” (თბილისი) – “ფახთაქორი” (ტაშკენტი) 4:0 (1:0).

“დინამო”: გოგია, ებრალიძე, კანთელაძე, ჭელიძე, ხინჩაგაშვილი, გავაშელი, მ. მაჩაიძე, ასათიანი, გუცაევი (წერეთელი), გ. ნოდია, ლ. ნოდია.

“ფახთაქორი”: ბოკატილოვი, ტურგუნოვი (იაფაროვი), შტერნი, ბასოვი, გოლიკოვი, ივანოვი, ვარიუხინი, ფიოდოროვი, აბდურაიმოვი, ლისაკოვსკი (ხოძიპანავისი), ანი.

მსაჯი: ი. პონომარიოვი (კიშინოვი).

დუბლიორები – 2:1 “დინამოს” სასარგებლოდ.

ზუსტად ერთი თვე გავიდა, რაც თბილისელ ფეხბურთის მოყვარულებს თავიანთ მინდორზე არ უნახავთ დინამოელები. ამ ხნის მანძილზე “დინამომ” ესპანეთში მგზავრობა მოასწრო საერთაშორისო ტურნირში მონაწილეობის მისაღებად, შინ ჩამოიტანა ძვირფასი პრიზი, მაგრამ დროის ამავე მონაკვეთში საკავშირო ჩემპიონატის 2 მატჩი წააგო ვოროშილოვგრადსა და კიევში, რის შედეგადაც სატურნირო ცხრილში X ადგილზე ჩამოქვეითდა. დღის წესრიგში სრული სიმწვავით დადგა საკითხი შექმნილი მდგომარეობის სასწრაფო გამოსწორებისა. კერძოდ, “ფახთაქორთან” გამარჯვებას თბილისელები რამდენიმე ადგილით წინ გადაჰყავდა.

მატჩის პირველივე 10–15 წუთში ნათელი შეიქნა, რომ ტაშკენტელები ვერ უმკლავდებოდნენ მასპინძელთა ხშირ იერიშებს. მათ გამოცდილი ტურგუნოვი პერსონალურად მიამაგრეს გუცაევს, მაგრამ “ფახთაქორის” მცველი სისწრაფეში საგრძნობლად ჩამორჩებოდა თავის უშუალო მეტოქეს, რაც გუცაევს საშუალებას უქმნიდა ხელთ აეღო ინიციატივა და სისტემატურად ეწარმოებინა სწრაფი იერიშები. მას კარგად ესმარებოდა გავაშელი, რომელმაც კვლავ დაიკავა ადგილი ნახევარდაცვაში, შეტევას ხშირად და უნარიანად ერთვოდა ებრალიძეც და მარჯვენა ფლანგი მთლიანად დინამოელთა განკარგულებაში აღმოჩნდა. თუ მხედველობაში არ მივიღებთ აბდურაიმოვისა და ვარიუხინის ორიოდე საკმაოდ სახიფათო გარღვევას, თამაში უმთავრესად სტუმრების ნახევარზე მიმდინარეობდა.

მაგრამ გადიოდა დრო, ტაიმი უკვე დასასრულს უახლოვდებოდა, გოლი კი არ ჩანდა. საერთო უპირატესობას არ ჰქონდა შესაბამისი ფინალი. ასეთ სიტუაციაში საბედისწერო აღმოჩნდა ტაშკენტელთა მეკარის პოკატილოვის წამიერი უყურადღებობა და მისმა აშკარა შეცდომამ საშუალება მისცა “დინამოს” დანინაურებულყო. ეს საკმაოდ კურიოზულ ვითარებაში მოხდა 37–ე წუთზე. პოკოტილოვმა, რომელიც საჯარიმო მოედნის ხაზზე იმყოფებოდა, ხელით შეიყვანა ბურთი თამაშში და ზედ ფეხზე “დაუსვა” იგი გუცაევს. გუცაევმა შორი მანძილიდან ზუსტად დაარტყა და როცა პოკატილოვი უკან დაუბრუნდა თავის ადგილს, ბურთი უკვე ბადეში იყო გახვეული – 1:0.

მთელი სიძლიერით და, რაც მთავარია, ტაქტიკურად გააზრებულად, მოწინააღმდეგე მხარის სუსტი ადგილების გათვალისწინებით ითამაშეს დინამოელებმა მეორე ნახევარში. 53–ე წუთზე ასათიანმა საჯარიმო დარტყმა გაითამაშა გუცაევთან,

დაუცველ ადგილზე გაიყვანა იგი და პოკატლოვს მეორე ბურთის გამოტანა მოუხდა ბადიდან – 2:0.

მატჩის მოგება ამის შემდეგ რეალობად იქცა და თბილისელებმაც უფრო დამაჯერებლად, მეტი სიზუსტით განაგრძეს იერიშები. 67-ე წუთზე გ. ნოდის მიერ მოწოდებული ბურთი მშვიდად გაგზავნა “ფახთაქორის” კარში გავაშელმა, ორიოდ წუთის შემდეგ კი გ. ნოდისთან გათამაშებული კომბინაცია ზუსტი დარტყმით დაამთავრა ასათიანმა – 4:0.

მკითხველი, ალბათ, დაინტერესდება, თუ რატომ არ თამაშობდნენ ამ დღეს გუნდის ძირითადი წევრები ხურცილავა, ყიფიანი, ძოძუაშვილი. პირველი ორი მინდორზე ვერ გამოვიდა ტრავმების გამო, ხოლო რაც შეეხება რ. ძოძუაშვილს, მან დაარღვია სპორტული რეჟიმი და ამიტომ გუნდის ხელმძღვანელობა იძულებული იყო არ გამოეყვანა იგი თამაშზე.

რ. ქორიძე.

“ლელო”, 15 სექტემბერი, 1973 წ.